



Broj:
Sarajevo, 26.5.2014. godine

**PARLAMENTARNA SKUPŠTINA
BOSNE I HERCEGOVINE
PREDSTAVNIČKI DOM**

**BOSNA I HERCEGOVINA
PARLAMENTARNA SKUPŠTINA BOSNE I HERCEGOVINE
SARAJEVO**

PRIMLJENO: 26-05-2014			
Organizaciona jedinica	Klasifikaciona oznaka	Redni broj	Broj prijema
01-02-1	26/14		

n/r predsjedavajućeg Milorada Živkovića

PREDMET: Prijedlog zakona o dopunama Krivičnog zakona Bosne i Hercegovine

Na osnovu člana 99. i člana 100. Poslovnika Predstavničkog doma Parlamentarne skupštine Bosne i Hercegovine („Službeni glasnik BiH“ broj 33/06, 41/06, 81/06, 91/06, 91/07, 87/09 i 28/12), kao ovlašteni predlagač, podnosim **Prijedlog zakona o dopunama Krivičnog zakona Bosne i Hercegovine.**

S obzirom da se radi o Prijedlogu zakona visokog stepena hitnosti, jer se odnosi na situaciju uzrokovanu poplavama u BiH, predlažem da se Zakon razmatra po hitnom postupku, u skladu s članom 127. Poslovnika Predstavničkog doma

U prilogu dostavljam tekst Prijedloga zakona s obrazloženjem na bosanskom jeziku, odredbe Krivičnog zakona Bosne i Hercegovine koje se dopunjavaju, te elektronsku verziju Prijedloga zakona.

S poštovanjem,

Poslanik SDP-a BiH
dr.sc. Denis Bećirović

Na osnovu člana IV.4.a) Ustava Bosne i Hercegovine, Parlamentarna skupština Bosne i Hercegovine, na __. sjednici Predstavničkog doma, održanoj __. __. 2014. godine, i na __. sjednici Doma naroda, održanoj __. __. 2014. godine, usvojila je

**ZAKON
O DOPUNAMA KRIVIČNOG ZAKONA
BOSNE I HERCEGOVINE**

Član 1.

U Krivičnom zakonu Bosne i Hercegovine ("Službeni glasnik BiH", br. 03/03, 32/03, 37/03, 54/04, 61/04, 30/05, 53/06, 55/06, 32/07 i 08/10) u članu 48. u stavu 1. iza riječi: „okolnosti pod kojima je djelo učinjeno“ dodaju se riječi: „posebno vodeći računa o tome da li je djelo učinjeno za vrijeme ili neposredno nakon požara, poplave, zemljotresa ili druge prirodne nesreće“.

Član 2.

U članu 212. iza stava 1. dodaje se stav 2. koji glasi:

„2. Ko iskorištavanjem stanja nastalog požarom, poplavom, zemljotresom ili drugom nesrećom prodaje, kupuje ili vrši razmjenu robe ili predmeta koji su prikupljeni u humanitarne svrhe kaznit će se kaznom zatvora najmanje tri godine“.

U dosadašnjem stavu 2. koji postaje stav 3. iza riječi: „iz stava 1.“ dodaju se riječi: „i 2.“.

Član 2.

Ovaj zakon stupa na snagu osmog dana od dana objavljivanja u „Službenom glasniku BiH“.

Predsjedavajući
Predstavničkog doma
Parlamentarne skupštine BiH
dr. Milorad Živković

Predsjedavajući
Doma naroda
Parlamentarne skupštine BiH
dr. Dragan Čović

OBRAZLOŽENJE

I. USTAVNOPRAVNI OSNOV

Ustavnopravni osnov za donošenje ovog zakona sadržan je u članu IV.4.a Ustava BiH, po kojem je Parlamentarna skupština BiH nadležna za donošenje zakona koji su potrebni za provođenje odluka Predsjedništva BiH ili za vršenje funkcija po Ustavu. On je nesporan, jer je riječ o dopuni postojećeg Krivičnog zakona BiH.

II. RAZLOZI ZA DONOŠENJE

Razlog za donošenje predložene dopune Krivičnog zakona BiH je potreba za strožijim kažnjavanjem počinitelja krivičnih djela koji koriste stanje prirodne nesreće da bi činili krivična djela i na taj način pribavili protupravnu imovinsku korist.

III. OBRAZLOŽENJE PONUĐENIH RJEŠENJA

U članu 1. ovog prijedloga zakona predlaže se da sud, prilikom odmjeravanja kazne, kao otežavajuću okolnost posebno uzme u obzir okolnosti pod kojima je krivično djelo učinjeno, a naročito da li je krivično djelo počinjeno za vrijeme požara, poplave ili druge prirodne nesreće.

U posebnom dijelu Krivičnog zakona BiH predlaže se dopuna člana 212. Nedopuštena trgovina, te kao poseban oblik ovog djela nedopuštena trgovina robom ili predmetima namijenjenim za humanitarne svrhe i propisuje kazna zatvora najmanje tri godine.

IV. FINANSIJSKA SREDSTVA

Za provođenje ovog zakona nisu potrebna dodatna finansijska sredstva.

ODREDBE KRIVIČNOG ZAKONA BOSNE I HERCEGOVINE KOJE SE DOPUNJUJU

Opća pravila za odmjeravanje kazne

Član 48.

(1) Sud će učinitelju krivičnog djela odmjeriti kaznu u granicama koje su zakonom propisane za to krivično djelo, imajući u vidu svrhu kažnjavanja i uzimajući u obzir sve okolnosti koje utječu da kazna bude manja ili veća (olakšavajuće i otežavajuće okolnosti), a osobito: stepen *krivice*, pobude iz kojih je djelo učinjeno, jačinu ugrožavanja ili povrede zaštićenog dobra, okolnosti pod kojima je djelo učinjeno, raniji život učinitelja, njegove osobne prilike i njegovo držanje nakon učinjenog krivičnog djela, kao i druge okolnosti koje se odnose na osobu učinitelja.

(2) Kad sud odmjerava kaznu učinitelju za krivično djelo učinjeno u povratu, posebno će uzeti u obzir je li ranije djelo iste vrste kao i novo djelo, jesu li oba djela učinjena iz istih pobuda i koliko je vremena proteklo od ranije osude, odnosno od izdržane ili oproštene kazne.

(3) Pri odmjeravanju novčane kazne, sud će uzeti u obzir i imovno stanje učinitelja, vodeći pri tome računa o visini njegove plate, njegovim drugim prihodima, njegovoj imovini i o njegovim obiteljskim obavezama.

Nedopuštena trgovina

Član 212.

(1) Ko neovlašteno prodaje, kupuje ili vrši razmjenu robe ili predmeta čiji je promet zabranjen ili ograničen propisima Bosne i Hercegovine ili međunarodnim pravom, ako takvim djelom nije učinjeno drugo krivično djelo za koje je propisana teža kazna, kaznit će se kaznom zatvora od jedne do deset godina.

(2) Roba i predmeti iz stava 1. ovog člana oduzet će se.